



施
愚
山
花
生
麻
譜

卷676.473
803.2

Kodak Color Control Patches

原本校閱姓氏

崑山徐乾學健菴

新城王士禛阮亭

秀水朱彝尊竹垞

吳縣潘耒稼堂

華亭王項齡瑁湖

長洲汪琬茗文

桐城張英敦復

長洲尤侗展成

吳江徐鉉電發

睢州湯 斌潛菴

宜興陳維崧其年

德清徐 倬方虎

溧陽史 夔耕巖

任邳龐 塏雪崖

商邱宋 舉牧仲

常熟蔣 伊謂公

錢塘高 輿巽亭

桐城姚文燮經三

濬陽張榕端樸園

語水吳之振孟舉

長白曹 寅子清

儀封張伯行孝先

仁和湯右曾西崖

吉水李振裕維饒

開封王式穀

甯陵高于湄

固始宋 生子春

長洲張大受日容

新安汪士鋐扶晨

宜興儲 欣同人

毘陵邵長衡子湘

泰州俞 梅太羹

南陵劉 楷蘧菴

黃岡杜 濬于皇

貴池曹曰瑛渭符

江都卓爾堪子任

宜興儲在文理質

江都唐繼祖序皇

歙縣張 潮山來

同邑高 詠阮懷

同邑孫 卓子立

同邑茆薦馨楚畹

同邑梅 庚耦長

施愚山先生年譜序

年譜之作其當有宋之世即自一二鉅公長德大集流布後人景仰其休風卽其所著按其行事年經而月緯之吳仁傑之譜靖節少陵呂大防洪興祖之譜昌黎文安禮之譜柳州是矣然此猶屬隔代也六一譜于薛齊誼南豐譜于朱子三蘇譜于何掄龜山譜于黃去疾紫陽譜于李方子勉齋譜于潘植鄭元肅陳義和雙峯譜于胡默成或親問業或私淑諸人其言動爲可信而辭不虛美故吾以爲年譜之作卽世家之體較之遺事行狀尤嚴必其德業崇閎文章彪炳始克足以當此未有以草亡木卒之人而可施之以編年紀月之法者也宛陵施侍讀愚山

先生其學非一世之學關閩濂洛之學也其文非一世之文陶杜韓柳之文也位不稱德卒官侍從先生嘗自編年譜散佚不可復得其曾孫得仍州守因其尊甫隨村先生所編詩文目錄益以誌狀碑版之文釐爲四卷以繼先志嗚呼後人誦先生之詩讀先生之書卽是譜以知先生之爲人而以論其世先生之梗概亦大畧可覩矣或疑先生行事炳在天壤上宜傳之國史次宜俟天下後世學者之論定而此譜之作特出自其孫曾得無私而不公歟家猷而未可以爲國憲歟而吾以爲得仍亦猶行古之道也在宋范文正之譜編於五世孫之柔陳忠肅之譜編於七世孫宣子黃豫章之譜編於孫營葉信公之譜編於子

應支在元程雪樓之譜編於孫世京在明楊文敏之譜編於六世孫肇吳文定之譜編於五世孫家楨其他子孫之揚其先烈者如周仁俊之譜文襄劉持善之譜忠愍章應玄之譜恭毅陳其柱之譜文定遽數之而不能終也夫其人苟無可譜雖子孫不得諂其祖父其人苟有可譜其家庭之所訓行較之他人不更親且切乎得仍之爲是譜也何傷夫得仍亦猶行古之道也余與先生爲詞科後起而與得仍又共列同歲之名因徵前哲之例而序之以附於私淑諸人之列謹序乾隆丁卯七月望仁和後學杭世駿

施愚山先生年譜卷一



先生姓施氏諱閏章字尙白一字祀雲號愚山一號媿蘿居士又號夔齋晚號矩齋江南甯國府宣城縣雙溪里人

施氏系出魯施父始祖伯玉公施父五十九世孫也生於元之至元自湖城遷宣焉是爲雙溪始祖

六十二世祖明義公生元之天厯明興族人染藍玉版籍誅戮無遺類公以從戎守禦撫州獲免事定圖歸雙溪祀族獲存七十世祖諱鴻猷字允升郡學生學者稱中明先生振興理學師事陳九龍先生紹羅盱江傳爲名賢焦澹園鄒南臯諸公所禮重推遺產爲義田遊處講學皆成館舍事具家風述畧

思山先生集 卷一
俎豆鄉賢有中明子集行世

七十一世諱譽字曾省一字述明卽先生父也生而孝友絕人講學力善纘揚先緒具述畧中侍讀李公石臺爲立孝友傳以先生貴贈奉政大夫山東按察司提學僉事妣馬氏誥贈宜人

前明萬曆四十六年戊午十一月二十一日辰時先生生於雙

溪里第

萬曆四十七年己未

萬曆四十八年庚申先生年三歲

卽泰昌元年

家風述畧云閨章三歲失母又病疴鞠於吳大母憐愛甚又

大母吳太孺人行畧云閨章幼罹天譴三歲失先安人大母哺之又病疴屢濱死又示兩孫扎云跨亢兩孫汝命苦早失母吾爲汝淚流然汝有祖母恩勝汝母我當年喪母時未滿三歲又多病比汝苦倍也

天啟元年辛酉

天啟二年壬戌

天啟三年癸亥先生年六歲

初就傅入小學家風述畧云閨章初就蒙師府君卽授孝經曰此千古聖賢大根本

天啟四年甲子先生年七歲

蒙師劉伯陽先生墓表云閏章七歲從受業先生善講解工
書法督以孝經小學未嘗嬉言笑又六月十八日爲先祖母
生辰追痛成篇云七歲學畫荻八歲弄紙筆長跪受孝經探
懷給棗栗

天啟五年乙丑先生年八歲

家風述畧云八歲時與村兒相詬府君批頰赤痕墳起曳歸
索杖大母以身護之猶撲其首大母怒而推出曰止此一塊
肉可撲殺遂大哭府君跪謝移時不令起自後不復見撲猶
恒私敕之曰若復不率吾不撻爾於家吳大母亦日夜戒勿
犯爾父終父之世無敢嬉爭又重刻感應篇輯解序云余少

失怙病疴瀕死者數既八歲先君子手示一編云孺子薄福
多病幸而免於殤若無忘此蓋太上感應篇也

天啟六年丙寅先生年九歲

吳太孺人行畧云閏章九歲失府君大母日皇皇泣抱不孝
孤謂吾曩者寬而以而父在今責在而矣又叔父文學砥園
公行狀云閏章三歲失母九歲病疴幾殆先府君臨決以屬
公且戒毋愛以禽犢又家風述畧云叔父爲不孝閏章請遺
命曰此若子也蒙養惟正家教惟嚴毋使家有不肖之子又
祭叔父文云昔先大人見背叔父毀瘠逾禮閏章時方九歲
畧能記憶叔父執兄之喪如執父之喪閏章之喪叔父不克

盡猶子萬一何以視息人間世哉

天啟七年丁卯先生年十歲

祖父生辰詩云十歲稱藐孤瘦骨見突兀

崇禎元年戊辰

崇禎二年己巳先生年十二歲

劉伯陽先生墓表云閏章七歲從受業居六歲閏章能屬文始自辭去

崇禎三年庚午

崇禎四年辛未先生年十四歲

出應童子試

崇禎五年壬申

崇禎六年癸酉

崇禎七年甲戌先生年十七歲

元配梅宜人來歸宜人溪頭人諸生梅士好女梅宜人墓碣云宜人以萬曆戊午十二月二十六日生與施子同歲十七來歸

崇禎八年乙亥先生年十八歲

祖母生辰詩云十八病且婚生計日轉拙寒帷膏火明素壁圖書列

崇禎九年丙子先生年十九歲

家風述畧云叔父每數日詣館程課指授爲文法度手口交
率他人目爲善篇叔父見輒塗乙最後呈試牘二紙色喜曰
此文差可俄廢卷嘆曰恨不令汝父見遂大哭是時先君已
歿十年矣○按先生於是年補博士弟子隸縣庠

崇禎十年丁丑先生年二十歲

高公遺山詠撰先生行狀云公生而純粹又習聞祖父叔之
訓弱冠卽以制舉藝名噪里中兼治詩賦古文詞故其文益
高一洗明季平文帖括之陋而是時東南復社方盛非士之
賢而才者不得與公少從吾里沈徵君耕巖受學金沙周儀
部鹿溪先生見其文嘆曰此少年成就當出我輩上延之讀

書其家數年二公蓋皆嘗主盟東南者由是名益噪而公終
澹然無所與徒步擔簦以歸又石語軒詩序云憶昔弱歲與
子翔同學爲制科之文見其引繩尺辨毫茫淳涵旣深持滿
而發無不當意金沙周鹿溪先生嘗會江上下文士數百人
日試五篇於江上之士推子翔及余爲冠謂坐客曰此雙璧
皆國士也吳下人雖強項見其文皆歎賞奪氣

崇禎十一年戊寅先生年二十一歲

考功司郎中余公墓碑云崇禎九年公季子颺成進士知宣
城又云蓋公令吾宣時嘗亟賞閨章文字又酬莆陽余吏部
賡之先生古詩四章云公嘗宰宣城曰余國士故敘舊德爲

愚山先生年譜 卷一
多按職官表余颺崇禎十年任宣城知縣

崇禎十二年己卯

崇禎十三年庚辰

崇禎十四年辛巳

崇禎十五年壬午先生年二十五歲

茂綠軒詩集序云憶余初因孟貞交與治爲崇禎壬午年性故好詩然方從事舉子業後十年所與治多病余役在四方不能數倡酬今稍力爲詩而二君皆已死

崇禎十六年癸未先生年二十六歲

邢孟貞宛遊草序云往余癸未春讀孟貞詩慕之過石湖與

之遊

順治元年甲申

卽崇禎十七年

順治二年乙酉先生年二十八歲

避兵山居

祖母生辰詩云乙酉亂無象躑躅棄家室又有

買舟避兵袍笏嶺亂後和劉文伯郊行暫歸雙溪敞廬又邢

孟貞石曰全集序云乙酉冬始與孟貞稱詩兩人指歸各以

自闕孟貞疑余或岐之余亦疑孟貞或予岐而俱不以相告

也又高遺山撰公行狀云及本朝定鼎始補博士弟子員

按是年先生受知於高柱河先生名次一等第二食餼縣庠

其文爲蓋均無貧三句學則三代共之四句溯先生採芹在

愚山先生年譜 卷一
崇禎九年間其文題爲不得其門而入跋載陳宗師評云
順治三年丙戌先生年二十九歲

八月 詔天下再行鄉試先生以義經冠易四房舉第十八
名受知於同考試官本房長洲縣令田華麓本沛正主考內
翰林弘文院檢討張公端副主考內翰林弘文院檢討呂公
伯承崇烈一時誦先生之文者蓋不脛而走四遠冬李宜人
來歸又家風述畧云閨章既舉於鄉始製一善衣叔父望見
喜泣曰爾祖盛德皆沒齒布袍孺子好白愛是年秋遊吳有
敬亭山贈別錢聖月時余將適吳門舟泊閫門宿燕子磯等
作

順治四年丁亥先生年三十歲

春赴禮部試未終闈而歸 先生燕遊草小序云燕都之遊
始自丁亥春公車北上是歲以多病未竣闈事卽遄歸矣有
都門懷古頓坊夜發真定道中折桃花伏羲生身處晚渡黃
河諸作

順治五年戊子先生年三十一歲

歸雙溪閏四月先生長子彥溥生夫人李氏出

順治六年己丑先生年三十二歲

春舉禮部會試中式一百九十二名本房易四房內弘文院
檢討宛平劉公德馨澤芳七大總裁秘書院掌院事大學士

榜式瀋陽范公文程國史院掌院大學士榜式滿洲剛公林
弘文院掌院大學士滿洲祁公克格秘書院大學士太子太
保兵部尚書都察院右副都御史南安洪公承疇弘文院大
學士遼陽甯公完我國史院大學士商邱宋公權弘文院大
學士會稽王公文奎觀政刑部夏卽歸里 湖西告病乞歸
狀云己丑叨中進士旋補刑曹一病歲餘至辛卯方得赴部
又夢母詩云閨章十歲而孤背母時甫三歲己丑舉禮部歸
次江北夢吾母破冢而出如卧初起且呼就語驚寤遂失聲
書以誌吾痛焉又太宜人墓誌云閨章三歲失恃生不識母
及登第歸過鳳陽夢一婦人裂土而出如病初起如寢初興

欠申久之張目熟視呼閨章前著膝上曰兒勿怖吾若母馬
氏也是時心知母久歿乃大悲喜過望謂吾母果復生矣遽
失聲寤

順治七年庚寅先生年三十三歲

卧病里門 寄沈耕巖先生扎云章自黍鄉薦卽違素心已
庚之間病且逾歲數瀕於死又玉山惠照寺碑記云予登第
後病甚聞家人語聲輒築築然恐休於寺中

順治八年辛卯先生年三十四歲

春始移居東郊赴官比部補刑部湖廣司主事秋奉使廣西
以 覃恩贈父述明公爲承德郎刑部湖廣司主事母馬繼

母胡並安人妻梅封安人 有移居東郊詩力疾赴官比部
奉別家叔又夜直西曹使過陽信奉使粵西答長安諸公送
別抱關無吏諸生數輩出尊簋曰吾輩皆誦習先生文章毋
庸驛吏也留詩贈之又有使廣西記宋荔裳詩集序高公行
狀云辛卯秋八月 世祖章皇帝大婚禮成上 皇太后徽
號 遣使詔赦天下公得與使廣西時兩粵初開定南王方
有大功貴重無比叱咤顧盼自豪也公入謁王獨喜曰前使
者數輩皆自衡永返君越險至此良厚幸吾聞君名士善屬
文此中山川奇奧可娛客盍遍遊乎公以使事不敢王曰粵
西道里綿邈卽詔書錄黃下諸郡取遵奉非月日可悉致度

此時返旆矣何鬱鬱坐守哉王遂爲公治裝下灘江歷蒼梧
陽朔諸峯抵平樂而李定國之亂作定南王死之公慷慨書
絕命請自誓其同年平樂守尹公冀階急以小艇載公曰某
等守臣君過使也俱盡無益故公得不及於難

順治九年壬辰先生年三十五歲

春三月奉使廣西達桂林秋七月桂林陷從平樂經江西而
歸冬抵里門時祖母吳太安人於辛卯秋卒先生以冢孫承
重 高公行狀云旣歸而公以長孫丁祖母吳夫人艱哀毀
成疾幾殆家居者又數年有粵江賦使粵紀行壬辰元旦聞
雷詩有壬辰四月六日舟次昭江赤壁登江夏洪山寺塔泊

嘉魚二喬墓望君山湘夫人祠白潯陽至長沙舟中雜詠花
藥山相傳何仙姑採藥處東粵客夜五日東莞令王句溪宴
津亭南華山大庾嶺十八灘中秋夜泊樟樹鎮過秦和縣諸
詩

順治十年癸巳先生年三十六歲

丁大母艱 春正月遊天都有天都夢遊夏四月朔遊白岳
有遊詩秋八月修葬事奉吳太夫人卜藏於湖北大家山之
麓閒雲菴記云癸巳冬十一月予遊郡城南得一菴曰閒雲
又寄沈耕巖先生云上元後一日薄遊新安意欲從白岳發
軻而褰裳蓮花峯頂盡覽其勝取道仙源以歸問字函丈真

快事也

順治十一年甲午先生年三十七歲

丁大母艱 春遊涇川有人日涇川詩夏秋先生往瀾中由
西湖至蘭亭剡溪娥江禹陵而返著有越遊草九月梅宜人
卒於家有悼亡詩四首十月遊九華山

愚山先生年譜卷一

愚山先生年譜卷二

順治十二年乙未先生年三十八歲

春服闋補刑部廣西司員外郎次子彥恪生側室蔣孺人出
宣城會館記云改革初爲大力者所據且將鬻之己丑予
釋褐力爭乃復出乙未春服闋入都始就此解裝又夢愚堂
銘云施子返自粵西載懼憂感除服北征宿於青州之官舍
酒酣就睡若有見焉持半刺署愚山道人四字時順治乙未
三月之望日也至京師以告侍讀學士龍眠方先生答曰嘻
殆子之前身也因呼余曰愚山子高公遺山行狀云乙未公
再補本部員外郎大司寇瀛洲劉公主部一見卽引與議論

悉合嘗謂諸曹郎曰天道神明人不可獨殺若殺人當論者則不可赦君但見重囚被銀鑰囊三木以丐生亦曾見有血肉狼籍跪伏其傍者乎此意惟施君可與語耳公之讞獄也雖比律精切必以引經斷獄爲法再四以求律外之意故劉公於諸司事嘗復看詳於公則否公用是益自發舒所全活至數十百人而大奸亦無得漏網者暇則與同舍郎及詞英數公相倡爲古文歌詩稱燕臺七子自是益有聲公卿間行述云官京師與譙明張公菊溪許公錦帆趙公顯亭嚴公飛濤丁公胤倩陳公有燕臺七子詩睢州湯公潛菴撰公墓誌銘云諸卿大夫素以公嫻文辭或不習吏事至是藉藉言公

可大用矣是年有除服北征遭值雨雪回憶粵西遭亂有述又有再補比部陪祀郊壇諸詩

順治十三年丙申先生年三十九歲

在刑部秋奉使督學山東 有首春 駕幸海子詩又有夏至陪禮方澤曉入西院詩六月十八日爲先祖母生辰追痛成篇詩遊西山有遊記高公行狀云會 世祖章皇帝方右文興庠序詔重學臣選以尙書郎才者充之公與焉 御試拔其尤七人公爲第一命視學山東公嘆曰吾家以理學孝友三傳而皆困諸生今吾忝一第抗顏稱師敢負吾 君以

負吾祖父乎

行述作 御試文二篇今考其題爲其爲物不貳合下二節註云內院試授山東學使正卷次

題則莫曉也

又有九日集金魚池余將視學齊魯留別諸同舍詩
又有赴官山左詩歷下長至詩又獨樹軒記云予以丙申冬
十月抵歷下受事又十二月有重訂制藝引云夫余之窮精
殫思從事於斯有年矣操儒生家言斤斤求當於聖賢之指
含毫揣摩如見其人如聞其聲懼弗肖也曲以赴之懼弗達
也擴而張之懼弗工弗潔也追琢而濯磨之根極理要斟酌
時宜采春華而佩秋實蓋未敢以矜氣出之躁心乘之而求
其毫髮無憾憂憂乎難言也

順治十四年丁酉先生年四十歲

春始巡試校各學士以覃恩贈父刑部公奉政大夫山東

提學道按察司僉事母馬安人胡安人並宜人妻梅安人贈
宜人繼妻李封宜人築獨軒有記云其明年當鄉試趨視
學校士又奉部檄文明約束不得與賓客通凡八閱月驅
馳六郡湯公潛菴墓誌銘云公既負文名久士子爭自磨礪
冀得一當公意而公教士以通經學古爲先論文崇雅黜浮
風氣爲之一變其應御試也大學士安邱劉公實薦之後
屬其同年孤子竟以文不入格被黜落劉公語山東巡撫曰
學臣不受請託獨施君耳公以能舉其職與劉公之能相與
有成也時人以爲兩難云高公遺山行狀云其論士必先行
而文以表章先賢崇尚文術爲舉其職蒞官期月葺孟廟闕

子祠又嘗過鄒平謁漢伏生墓視其祠堂壁間畫鼉錯受書圖慨然嘆曰先儒抱遺經授受絕續之際其難如此而魯兩先生祠在泰安者祀孫明復石守道皆久廢公並爲新之碑其事公之初至濟南也嘗夢至一處見古衣冠丈夫揖而若有所屬者三次日與藩使孟津陳曠遊藥山尋李滄溟先生墓墓蕪沒不封樹一豐碑無字仆草間藩使曠指而喜曰此待公也公悅然悟夢中事卽自爲文勒其上植墓道間又詢邊尙書貢之後各爲置奉禮生一人守其祀一時修舉廢墜東國之士皆快然以爲頓還鄒魯舊觀至今取上第致通顯崇經術而尙古學者不問而知爲施先生弟子也故先生有

祭閔子廟文重修伏生祠記魯兩先生祠記七忠祠記又有章邱官舍元夕詩四月十五日宿蓬萊海潮菴詩望日樓看

日出歌蓬萊看海市歌

註丁酉四月十八日

東海廟衍聖公荷亭濟南

九日登歷山濟南除夕詩又有請復四氏學科場恩例議又夔齋詩話云丁酉三月十有九日初至東萊校士唱名甫畢雷雨大作水深尺許是時苦旱久矣口占二絕志喜以壯多士

順治十五年戊戌先生年四十一歲

校士山左 重建東昌考院記云戊戌春旣畢試郡諸生僉言考院不可不復狀又祭嶽廟文註戊戌四月七日泰安州

愚山先生年譜 卷二
作又書靳莊事云戊戌四月十一日記又有祭和聖祠又有
闕里祭孔廟文云維戊戌冬十一月朔四日又有登岱四首
五大夫松下尋歷下亭舊址諸詩

順治十六年乙亥先生年四十二歲

校士山左 禹廟碑記云己亥春兗州甯陽縣北三十里新
葺禹廟成主之者工部屯田員外郎劉君元琬以書來請紀
日月閏章謹記之有禹廟歌又遊龍洞山記云己亥夏五月
視學既竣念不可失龍洞乃偕藩使袁君參臬陸君戎帥劉
君往又己亥夏五月二十有七日作函山記於石屋又有提
學道題名記己亥中秋後一日干佛山房作仲由墓詩又有

海岱人文總序

順治十七年庚子先生年四十三歲

白山左得代歸里 集白山左數年以來詩文刻爲觀海集
有自序又周公廟碑又重建東嶽廟記云予秩滿將歸道士
任志德及諸父老丐文以記又清源行小序云視學秩滿將
歸道經臨清諸生攜具相餉却再四不可作清源行又有過
臨清問謝茂秦發濟南示諸生詩甯陽行袁卓湄送至任城
泊舟露筋廟有歸舟雜興詩集又改宅使粵紀行本云庚子
四月朔日舟中定又批彭蠡阻風二十日詩云阻風是最不
得已事然往往有得意詩余庚子三月白山左舟回一月皆

石尤風亦有短歌又有眞州夜發至京口又八月復遊京陵
京江廣陵有江行近詩又有庚子九日登金山絕頂妙高臺
夜坐懷無可詩金山寺廣陵兒女行登文選樓平山堂董仲
舒祠又庚子冬暮歸自廣陵阻風述悶四十韻排律曉望燕
子磯舟中望羊石又茂綠軒詩集序云庚子四月予歸見其
病坐榻上不能揖固強余酒食謂後此恐不相見九月二日
予在牛渚舟中偶讀其序爲之涕零次日抵金陵索與話則
先一日死矣入哭於其床然後知舟中涕零時卽其死日也
生死之相感如此

順治十八年辛丑先生年四十四歲

居里秋奉 命分守湖西冬作就亭是歲春夏先生遊西湖
有湖上吟小刻其詩有采葦篇西湖竹枝詞西湖送春歌
微雨至淨慈寺宿吳山文昌閣泛舟孤山上天竺雙檜峯作
暮投六一泉四月十七湖中看月宗伯牧齋錢公序之又先
生自題小影云辛丑春夏久客西湖秋自里門奉 命分守
湖西有自皖江過彭蠡九日泊樟樹鎮九月十三日初入臨
江湖西到官後寄親舊詩又有江行詩錢牧齋先生序之高
公遺山行狀云辛丑奉 命分守湖西地轄臨袁吉三州惟
臨江可駐節而袁吉皆罹獻賊及左甯南兵殘毀畧盡袁郡
之民無土著流人占籍自耕驚悍者聯爲堡寨具兵仗屯各

數萬人號曰麻棚多匿捕逃公馳檄諭之編爲保甲聽約束
吉有文昌折桂二鄉勝國時朝貴接踵故以名其鄉亂後皆
依險自固租逋不可問鄉有諸生某者間出吉水令執之以
告曰是其髮垂垂長袖而方山冠叛人也請僇之公盛陳兵
衛縛以赴市復呼之入曰汝一諸生而聚千伯村愚抗國
法罪當死吾姑貰汝速歸告爾眾泥首請命保乃父母妻子
不者朝廷遣一旅頽爾宮墟爾土矣旬日諸勢家豪吏皆
感泣出請征輸如例兩郡之民賴以全而是時西南方用兵
臺檄以公督逋賦乃作勸民急公歌垂泣而諭之又遍歷崇
山廣谷間悉窮民狀作彈子嶺大阮嘆竹源阮諸篇以告當

事聞者人爲流涕曰施使君今之元道州也爭輸恐後居一
年而民始有甯宇公壹意休息吏不能爲暴又數平冤獄案
牘益簡每高春一視事而已又先生湖西行小序云辛丑歲
分守湖西壤瘠歲飢有司坐逋賦失職相望予奉檄按部督
促是時西南用兵不逾時符牒三四至吏民後期者法無赦
於乎一官貶斥不敢辭民且不免死然則緩征陷法傷人滋
多有痛相告誡而已作湖西行又大阮嘆一作東山吟小序云新
淦縣東山有大阮其俗不急賦稅不用兵則吏廢法余檄招
之幸有至者諭以利害繼之流涕眾皆感泣於是陰捕其豪
十餘人後至者蟻集雖然比歲宿逋累鉅萬猝何能補故作

詩憂之又竹源阮小序云悲民難也地在新淦之東山其隣曰大阮多盜兵至走官檄竹源諸阮義眾捕之而逸其豪已而盜殺竹源殆盡君子傷之又采風偶錄序云施子分守湖西將期月壤瘠事簡與民休息進諸生試之次第鏤其文是年作就亭有記

康熙元年壬寅先生年四十五歲

分守湖西秋愚樓成 書慧力寺僧冊云壬寅正月朔二日予以事出城南得古刹曰慧力刻谷音作谷音序又三月望後一日游青原山有記又游春浮園有記高公行狀云臨郡南對閣皂山有清江碧嶂之勝橘柚之洲環城三十里官舍

有樓曰愚樓亭曰就亭亭之吳桷椽瓦皆以竹爲之公所置也以供偃息資吟眺客惟好詩者過焉間嘗行部吉州修景賢白鷺諸書院祀王文成鄒忠介羅念菴諸公嘆曰此文章節義三邦士不興行咎在守土者因日與諸生講學其中或屏騶從縱觀金牛石蓮諸洞壑訪前賢遺蹟相與游宴賦詩雖其地之隱人逸士皆稍稍出就公曰是能涵濡道義吐納風流以文學飭吏治者有臨江憫旱新穀篇諸詩又貽林茂之約帳詩又重修黃山谷先生祠堂記云壬寅之秋予嘗登快閣有愚樓記又中秋同伯調赤方阮懷子長集雲根亭詩又中秋夜愚樓觴月歌又十月有甘林遊記甘林讌作有壬

寅五月四日臨江官舍作

康熙二年癸卯先生年四十六歲

分守湖西是年巡道缺裁歸併守道 有癸卯二月廿七日
與半山扎云巡務歸併徒多費幾斛心血耳一人擔兩人之
擔惴惴蚤負而責望者乃欲求倍於昔諺云多一菩薩添一
香爐未聞去一菩薩而多一香爐也有與毛方伯論遺才書
自註云偶爾寓書不意此稿遂傳布浙中爲美談孔子所謂
出其言善千里之外從之也有江行雜詩有元日同諸子登
官閣五律人日同張清江郊行寒日惶恐灘詩江上絕句有
發袁江有竹源坑有吉州九日登天華山有青原謁五賢祠

有重九後九日同諸公入青原留宴山亭有苦節篇答友有
紫芝歌云歲之癸卯夏初吉石龍城南芝草出有嘉禾不書
萋楚嗟忍拾山菌侈奇瑞之句又諸賢重會白鷺洲三日有
鷺洲講會歌小序云西江講學之會吉州最盛中輟者四十
年矣余以癸卯十月修復舊事布衣野老皆許以客禮相見
會者近千入又有冬雷行又有臘月八日同諸君青原卽事
十絕又有歲杪歸臨江聞吉州諸子仍集鷺洲講學欣然成
詠又馬季房序云癸卯冬濬泉作亭鑿石爲記又有金牛泉
取亭記又有紫芝山詩記又癸卯七月朔有書楊文貞公自
撰墓誌銘後又有愚樓獨坐官湖西二載無感而有作諸詩

康熙三年甲辰先生年四十七歲

分守湖西是秋入 觀暫過里門 有歲朝登愚樓詩有元

日占年逢甲子平生知我是江山之句正月二日同家人飲
梅花下醉而得詩又有夢亡友蔡大美論詩臨別索酒甲辰
三月十一日詩有甲辰午日寒甚是江南所未有詩又有麻
棚謠萬載謠又有甲辰五月十六日遊化成崖小記甲辰七
月廿七日青原五賢祠祭文又羅文恭像贊又甲辰八月八
日有入賀日記有北征詩一云于役詩行役詩又九月十一
日與中作讀莊偶論有歲暮過里門五古詩

康熙四年乙巳先生年四十八歲

入 觀暫過里門夏還湖西 有對酒歌正月文杏菴敬亭

山同諸子雙塔寺二月北樓夜醉贈別龔使君扶萬二月十
七日重刻旌陽會紀跋三月廿二日題陰山射獵圖有重赴
江西五月午日置酒鷺洲秋就亭漫興又八月三日有五言
律詩自跋九月七日遊閣山歸燈下草清溪菴記又季冬之
六日有遊青原又記十二月十六夜草永甯縣治記又白嶽
遊記自云此文向已刻之新安頃恨其太瑣如賬簿又喜五
老峯一段不忍焚棄遂痛刪之計今已十三年矣乙巳除夕
前三日記又遊九華記自註云白嶽九華二記皆十年前矣
歲杪括殘稿得之刪存十五六或訝其大畧予謂正恐蕪耳

山猶人也識面而全體斯具記山者豈必一邱一石之不遺哉禹貢及水經注千古遊記鼻祖不可彷彿杜老有云佳處領其要亦猶愈於路程本子也乙巳歲除前一日自記于芙蓉屋又五言律詩自註云平生詩五言律較多庚子春山左試士竣隲括得四百餘首皆自少迄丁酉作也繕二本一存家笥一攜自隨辛丑冬杪方龕山過臨江日與商度去取雖所論不同要各存其見也簿書填委閱三年不一省覽龕山所定本已失之矣搜得此稿觸目如夢與荀仲先生重定之甯使澹樸毋近時人單詞隻字間有更易蓋皆餘興所及無暇苦吟唐人有云想到白頭日刪詩賸幾篇惟巖故精也計

丁酉以前已存三百餘首可刪者尙多今且九年矣待刪之作又不知有幾許也乙巳八月三日愧蘿居士識於蕭浦舟中

康熙五年丙午先生年四十九歲

分守湖西 丙午上元前三日作瀟江倡和集序入春春日官亭漫興夜坐就亭侍家叔父聞諸公集來鳳亭早春卽事一春懶作詩偶題遣興秋夜金牛泉中洲精舍九日暮秋登化城巖和伯衡長至見寄諸詩又石蓮洞記云歲之丙午十月甲戌舟泊吉水桐江灣風日晴好又有石蓮洞詩又有告神驅虎文

康熙六年丁未先生年五十歲

分守湖西是年秋以裁缺歸 義田記自記云丁未正月晦日阻風市汭肩輿赴南浦寒甚偶思屬草流泪者再四嗚呼先府君所爲者獨難雖屢牘不能盡也又二月廿三日偶草熊御史仲龍傳畧又四月作李侯監兌水陽倉兌軍記又重九前五日遊西山作西山遊記又有去官歸酬熊少宰又有晨登西山香城宿慧公泊樵舍石鐘山泊彭澤縣諸詩又大洋州英祐侯蕭公廟碑云康熙六年余以湖西道人 覲將北且攜家行秋冬之際番陽多北風懼愆 覲期爲禱於神乞風以濟願爲廟銘及湖風果便僉以爲神力乃復爲之碑

其畧

考先生以甲辰三年入 覲冬攜家過里門丁未已裁缺冬回里矣此六年有誤

又仲秋月朔

日草重修臨江府志序高遺山行狀云丁未公以奉裁當去三州之賢士大夫及諸生徒相與謀曰公將成行矣奈何急釀金建龍岡書院彌月而成羣奉公講學三日而後去以終公志且遂以祀云少司馬梅公李先生爲文記之曰以此爲公去思碑不大愈於世之侈談官績以諛其官長者乎及行民夾清江而送者上下數十里公灑淚爲詩以別其父老諸生徒人人飲泣而去又先生有送別湖西父老詩檢討毛西河奇齡撰先生墓表云已奉 命分守湖西所轄吉臨袁三府皆殘破袁有麻棚賊而吉之叛民多堡險文昌折桂兩鄉

與相通吉水知縣捕其梟長髮廣袖檻車膠軍門君陳兵撻鼓金若赴市者叱縛其人屠首髮割其廣袖衣而盡釋之使諭兩鄉民兩鄉民感激爭請得一見君歸命而麻棚之在袁者亦散去會廷議裁諸道使民留君咸釀金建龍岡書院請講學三日乃送君使君江上使君江上者臨江城外清江也民以其名清嘗曰是江如使君因改名之至是民送君江上不能別復送至湖會湖漲君所乘官舟御史所贈物也輕不能渡民爭買石膏填之已渡乏食賣其舟而歸案今有賣船行倡和集

愚山先生年譜卷二

愚山先生年譜卷三

康熙七年戊申先生年五十一歲

歸里門 有寄雲樓敘意省雙溪故園詩遊茅山有遊記云戊申正月人日出溧水暮抵山麓崇禧宮又有茅山元符宮書壁詩又有牡丹花下集親舊又五日集谿園詩又自七月十五日以後有閩遊日記至十二月廿一日旋里七月廿四日作碧巖記又有管夫人墨竹登吳興峴山飲窪尊亭同吳湖州飲孫太初墓側詩又西湖歎又中秋宋荔裳邀泛西湖值雨又過子陵釣臺又富春江作又釣臺記毛氏桂林記

康熙八年己酉先生年五十二歲

歸里門 正月十八日已後至五月三日作西江之遊著有
日記 二月二日夜作神岡廟碑廿一往盱江廿二作華山
畿詩廿三曉枕上作贈陶雲詩灌研齋集序廿四作哭友詩
三首桃花一絕句廿五枕上作南州草序廿六贈丁景呂詩
題寺閣補豹人詩廿四首廿七作先登叔墓碑又廬山志序
廿八補舊題詩一首三十日寓紫陽書院入麻姑山觀雙瀑
宿山中三月朔日山中冒雨歸是日留三詩在慈惠菴二日
諸公招遊從姑山及中洲寺得詩二首四日同仲光印茲遊
靈谷麻源回登鳳凰山五日辭客再遊從姑作一詩六日登
舟遊章山寺萬年橋又遊潮音洞八日補華岡二詩九日入

城得三詩十日晚酌宗伯花下二絕句十二雨中集李司馬
園中看牡丹作一律十五晚至閬園作長歌廿二作青原志
序四月七日偶得贈饒蔚宗詩九日小睡得贈方鄴詩又覆
舟詩註己酉四月十四日南州江中事廿四風雨如故又住
一日悶甚作馬外祖志銘廿六三山峽作尹志銘廿八重定
使廣西記廿九作方隣虎沈三烈傳冬遊江上十一月初九
舟中作送魏惟度歸武夷序又九日作重脩玉山惠照寺碑
記七日舟中作斗山楊氏族譜序廿三舟中草重修宛溪二
橋碑記廿五日舟中草廬陵縣志序又有盱江諸山游記又
有麻姑山中遲徐仲光不至雲門寺是麻源第三谷集家園

桂花下陪唐寓菴山行入甯陽界半山菴答王容部寄題就亭諸詩

康熙九年庚戌先生年五十三歲

歸里門冬改葬馬太宜人暨梅宜人於城南玉蔥山 有早春舍弟兩兒讀書雙溪詩閏二月廿一日作山門遊記七月三日舟中作吳母胡孺人七十壽序六月十三日董祠作程母七十壽序又族祖母彭氏七十序又總督麻公平賊紀德碑又九月二日枕上作先太宜人墓志又九月四日枕上作書亡妻梅宜人墓碣又十月作重修甯國府學記是年夏五月先生遊廣陵有汪舟次兩集泛舟紅橋

同劉公敵唐耕塢孫豹人程穆倩孫

無言廣陵值趙五絃歸自慶遠詩又金陵先賢祠堂歌又柏子

菴山門鑿鐵菴詩有句云靈蹟真無盡雙崖又石扉自云止改起句鑿鐵之義已了又有甯信寺看牡丹一簋約和張虛舟先太宜人改葬志感諸作

康熙十年辛亥先生年五十四歲

歸里門夏奉部檄敦迫入都補官以叔父年老辭歸作嵩嶽之遊長孫琮舉於家冬歸里 有元旦雪霽試筆七律又元旦後二日雪晴作又早春放舟至湖北舟中見新燕徐州五日諸詩在都與宋荔裳琬曹顧菴爾堪沈繹堂荃王西樵士祿程湟榛可則王阮亭士禎陳說巖廷敬詩歌倡和語水吳

孟舉有八家詩選之刻高遺山行狀云蓋既歸十年而吏部以公需次久移牒促公當補官公以砥園公老固辭行述云及歸里邑故有同仁館爲羅盱江先生講席府君力任修葺歲每二會率以爲常居數年銓部以起補促赴京師府君堅以先砥園公爲辭曰吾叔撫姪如子安忍不父事之叔父年逾六十吾豈以萬鐘易此一日也卒不赴出俸錢爲砥園公所出三弟置產使與吾兒等以奉叔父餘年歡秋八月投牒銓部卽爲蘇門嵩少之遊有將遊嵩嶽留別都門諸同好八月廿五日作蘇門山遊記又遊少林寺記又嵩山遊記法王寺題名記遊靈岩及石淙記又有得間吟韓祠歌蘇門緱山

廟宿少林面壁洞贈孫鍾元徵君九日登法王寺望少室登太室中峯嵩頂書壁高登巖石室九龍潭歌漢柏過箕山石淙諸詩爲嵩洛集經王阮亭評定

康熙十一年壬子先生年五十五歲

歸里門秋遊黃山 春有過劉伯陽先生墓下作懷溪園梅花敬亭采茶園居較詩酬梅耦長自敬亭翠雲寺步至一峯菴望北郭一帶桃花率爾步履遣興敬亭閒雲菴側尋虎窺泉閨七夕和韻行徑三溪石壁秋八月遊黃山有浴湯泉鳴絃泉登老人峯雨止登煉丹臺自西海門登始信峯至石筍砭作白龍潭上桃花源作中秋夕坐光明頂看月歌黃山怪

松歌紫陽書院歌黃山連雨停宿暮登文殊院登蓮花頂書
煉丹臺側指月菴諸詩又黃山遊記又有斗山重九遊宴序

康熙十二年癸丑先生年五十六歲

歸里門是年先生受修寧國府志之役六月舉次孫璫皆長
子瀄出也 有署樓對月次韵和徐程叔雨後獨宿郡閣不
獲辭郡志之役聊述媿詩初至龍溪桂花三發敬亭雲齊閣
限齊字冬遊金陵有臘八日報恩寺遠塔登普德寺後山日
月逝酒漿楊商賢力疾送別徐田東見貽石溪偃松圖遺王
安節斗酒索畫得詩尋王元倬孝廉諸詩又有與曹太守言
紫陽書院事

康熙十三年甲寅先生年五十七歲

歸里門是歲滇南有警郡邑戒嚴九月三日寇陷新安人洶

洶四竄先生挈家避亂山中冬始歸 有春雪得看字連雪

不已仍前韻山行經野寺小憩新安路見攜家人山者接躋

又悲老牛谿村書事十首喜雨 註甲寅七月五日是歲正
月至五月皆雨六月大旱又

有老至有田間漫成又城南莊觀穫中秋對月 註東南
大用兵溪頭

行有我生三避寇川陸窮躋攀之句割蜜篇水東野望石龍

村三天洞同諸子作又有三天洞小記遊勞山又避亂偶還

見荒園叢菊方華慨然有作雨宿陶莊又甲寅歲立冬小雪

皆雷黃渡山莊蔡后山洞諸詩又有四言誠子詩

康熙十四年乙卯先生年五十八歲

歸里門 仲春望後七日作募勸印清華嚴尊經小引并偈

又春暮作西樂菴別構精舍記又夏五月遊金陵有修復依

仁齋記并詩又詩原序自云乙卯八月重定天然研銘自云

庚子三月廿一日燈下草乙卯秋重定作祖德詩二首又有

三君詠 孫徵君夏峯魏光祿 環溪張學士簣山 清明前二日經水東聞眾尋桃

花沼溪紅數里恨不果往敬亭精舍夜坐又花前答客又遊

江浦至吳門錫山有過江浦詢舊蹟江浦城西十里湯泉定

山寺同人集一拂祠講學登清原山歌秋林讀易圖自贈雞

籠山登覽經雞鳴寺作登惠山第一峯惠山寺試泉支硎山

晚赴花山曉登蓮華峯西山卽事夜投惠山靈岩山尋光福

寺玄墓聖恩寺虎邱偶題白樂天有吾年五十七詩九展成

又廣爲五十八余適當是歲因和之諸詩

康熙十五年丙辰先生年五十九歲

歸里門春遊旌陽冬遊南陵抵皖江 有旌陽西竺寺梓山

詩隱龍山記註云丙辰三月又有杪春自旌川還宣城道中

卽日呈同行吳香爲張鹿床又夏遊涇川新安有丙辰中秋

對月重九講學湖北又夢題敬亭山亭子覺來僅憶得起句

爲續成之有額珠樓壯丁篇過新嶺亂後新安作有文瀾亭

野眺南陵長至值雪晚泊李陽驛有江行次池口書懷櫻毛

行池陽至皖口漫興絕句又欲關小園作草堂不可得戲題
遣興又歸次蕪江雪後得好月十二月十五哀豫章又蜀道詩序
云丙辰十二月七日枕上作舟中稿瑟齋集序云丙辰十二
月七日早作舟中稿又先大父中明府君集跋家風述畧跋
註云丙辰十二月三日謹錄於皖江舟中

康熙十六年丁巳先生年六十歲

歸里門夏攜季弟就婚新安秋遊天台雁宕冬仲歸 有元
旦後一日立春初晴燈夕侍叔父卽事漫興有花山牡丹夏
間又有畫溪遊草庵畫溪游讌詩有崑山詩十六韻又芥茶
歌又有大安寺雨坐有懷水西隱龍山中曉望得句新都成

憶兩孫又柏槻祠堂行秋有台蕩草將遊天台雁蕩諸山酬
梅瞿山子彥送別南明大石佛登赤城國清寺高明寺自高
明寺之石梁道中得八韻石梁觀瀑登華頂巾子山自臨海
赴黃巖老僧崖謝公嶺出靈峯洞將往靈巖靈巖宿羅浮寺
大龍湫歌自羅浮寺度芙蓉嶺行經海濱樂清行白石村玉
甌峯東甌大觀亭登孤嶼江心寺發甌江至栝蒼道中過青
田桃花嶺諸詩有夕照菴記十月朔遊石梁有記

愚山先生年譜卷三

愚山先生年譜卷四

康熙十七年戊午先生年六十一歲

歸里門夏 詔開博學鴻詞科先生應徵入都 上元夕有

詩又有同木山閣昭瞿山耦長雪中偕李書卿赴姑山講會

又早春過雙溪別業示兒輩又姑江口號五月同聖月勉中

耦長諸子集方鄴藤軒又石埭尋姚明府閱橋東湖詩高遺

山行述云戊午 天子詔徵天下之才士開博學鴻詞科三

相國首上公名公復以情告之江南諸大吏持不可敦迫至

京 按三相國為李 爵杜立德馮溥 先叔父砥園府君行狀云歲戊午 上徵

博學鴻詞之臣閏章名玷薦贖辭至再不許公倚杖命之曰

聖天子曠恩也卽汝父在不能汝留汝行矣及拜別相持
泣賓御親從見者皆泣逾七月而公卒六月冒暑北行有應
召入都留別親舊四首有賣屋行有書秦淮水亭北征口
號寃寓舍中秋對月京邸對雪借書京邸立春夢叔父京邸
述病呈諸公得家書知大兒失婦 詔賜被薦諸臣月廩恭
紀又午門謝頒月廩是日 上未御朝恭述又有 大駕重
幸直北校獵恭紀聞王阮亭農部擢補侍讀魏環極侍郎見
過官軍連收岳陽長沙諸郡恭紀除夕同雪懷又有上內閣
言被薦人才試期一書又十月十六日示子云初到京一詩
不肯送人人相詫以爲簡傲作老名士狂態因勉作一二酬

答近且積疲成疾矣夫以詩文當竿牘代羔雁已屬陋習今
動則連篇百韻望塵獻諛炫玉求售百端可厭子雲以爲雕
蟲漢武畜以優俳非過論也又云 御試杳無定期他人恨
官遲我獨恨歸遲耳此間更無樂事亦如昌黎所云命坐磨
蝎宮合受此苦無所躲避平生最嗜霜螯頃來病窘都不復
朶頤此物北地頗多但味乏肥甘止堪爲南螯作婢省得老
饕饒挾亦非細事

康熙十八年己未先生年六十二歲

被徵在都三月朔 御試太和殿題爲璿璣玉衡賦一首省
耕詩五言排律一首同試者一百七十五人 欽定取中彭

孫適等五十人公名在二等四名初部議公以參議道原銜
食俸脩史告成後議敘奉 旨着授爲翰林官旋議授爲翰
林院侍講入史館纂修明史 有元旦試筆上元前一日入
遊御苑登洗粧臺早春廿二日微雪二月二日雪都下歲首
見盆桃作花又有往西山暫出國門潭柘寺分得柘字返自
潭柘道中有懷王侍讀阮亭又有戒壇三松歌又己未三月
朔同被徵諸臣集試體仁閣 上賜食且宣諭曰館選廷試
例不給饌嘉爾等學行名儒優以曠典是日治南饌張椅坐
蓋前所未有也恭賦紀 恩又有頒俸紀 恩詩示子扎云
試卷傳出都下紛紛訛言皆推我爲第一名久之半月後方

閱卷我絕不送卷輿內閣諸公初亦暗取在上上卷列三五
名中後因詩結句有清彜二字嫌觸忌諱竟不敢錄得高陽
相國爭之云有卷如此何忍以二字棄置此不過言太平耳
倘奉查詰吾當獨任之於是姑留在上上卷第十五又推敲
停閣半月則移在上卷第四皆此二字作祟也今 上傳案
出又改上上爲一上等上卷爲二等矣我平日下筆頗慎獨此
二字不及覺豈非天哉初取一等廿六名二等五十一名今
重經 欽定兩共止五十名又甚珍惜愛我者多以我名次
爲怏怏非知我者也高才博士遠出吾上而見放者甚眾吾
既犯嫌忌而復收之亞等過望矣所恨衰老空疎不任筆扎

徒爲他人笑柄耳又云御試卷事不俄頃多不能佳昔韓文公兩應博學鴻詞科不中其文亦不載集中其不得意可知卽其中甲科所爲不遷怒不貳過一篇載集中亦無甚佳足知風簷寸晷之難與漢楊班諸人尙書給筆扎精思研練者不同矣又有己未夏家園老梅作四花余適同孫子立茆楚畹高阮懷並官翰林中梅淵公諸故人作瑞梅圖歌索和漫題其後又己未京邸守歲同耦長歡字又作平湖湘頌又是年先生叔砥園先生卒於家先生聞訃京邸欲奔喪不得有祭文二首又顧甯人關中書至一首高公行狀云 御試授翰林院侍講充明史纂脩官而砥園公已先期歿公慟哭

成疾精力遂憊湯潛菴墓誌銘云又十年詔舉博學鴻詞之士三相國薦其才 召試授翰林院侍講纂脩明史公素以文學飭吏治至是始得當著作之任益自發抒考核同異辨析疑僞是非可否無所回互而朝士大夫習其姓名求碑版詩歌趾錯於戶四方名士負笈問業無虛日公一一應之不
少倦

康熙十九年庚申先生年六十三歲

在史館 有元旦擬早朝三月一日入直史館見玉河水色次陳其年韵又有庚申中秋又閏中秋又八月三十日 勅賜翰詹諸詞臣鮮藕紀 恩重九過封氏園又七月十八上

總憲魏環溪書偶遺阮懷檢討瓊褥枉詩為謝笑有此作次
和王侍讀阮亭喜諸子夜過二首送韓元少侍講歸營先墓
葬事殘歲憶諸從弟又庚申長至日後憶及內子李宜人以
嘉平月望五十初度率成一詩寄之以綠雪茶餉王阮亭及
邵子湘陸冰修却枉句索和又緒冬月望早朝客每稱予視
學山左舊事有感諸詩

康熙二十年辛酉先生年六十四歲

在史館秋奉 命典試河南正主考副之者為吏部員外劉
公元慧取中舉人宋生張伯行等四十七人秋杪便過里門
冬十二月赴 闕復 命 有召見乾清門又瀛臺引 見

又寒食感懷馮相國上巳招集萬柳堂限韵沙河作豆莊信
宿喜方渭仁編修見過又即過沙河橋訪渭仁秋七月留別
同館諸公時奉 命試洛中河南道中宋宮大梁試院中秋
夜同劉怡齋吏部九日登吹臺又贈別同考諸君又夷門又
臨發大梁留贈兩河新舉諸子又使塗暫歸有述又塗雪書
懷又湖北謁先墓宿雙溪舊館又到家題壁又河南鄉試策
問五道擬程文三首首題十室之邑一節次題柔遠人二句
三題禮之實二段

康熙二十一年壬戌先生年六十五歲

赴 闕復 命在史館第三孫琛舉於家次子恪出 有元

旦發高郵自高郵抵淮上三月三日集萬柳堂奉和馮相國
原韵又四月八日和萬柳堂及放生池元韻 大駕東謁諸
陵恭紀又偶成二首又都下諸公歲暮和東坡岐下三首余
亦漫和又和彭羨門偕梅菴忍菴華隱諸同年夜集寓齋之
作時壬戌除夕前三日有夜暖一冬無雨雪官寒五載飽風
霜之句又有送汪檢討舟次册封琉球序又書孝友傳後註
云壬戌十月

康熙二十二年癸亥先生年六十六歲

在史館轉翰林院侍讀充 太宗聖訓纂脩官閏六月十三
日丑時以疾卒於邸齋 有偶成二首和徐大中丞除夕用

韵二首有病中答博問亭七絕又病中憶卜葬處口占一首
蓋絕筆也行述云癸亥春正月奉 旨纂脩 太宗文皇帝
寶訓愈不敢自逸三月望日力疾趨 朝歸猶構成馮恭定
公傳自辰至酉坐風簷下膺寒疾遷延數月病中句猶云欲
報 主恩心未死以生銜 特恩齋志以歿未展報効爲恨
也湯公潛菴墓志銘云平日口期期若不能言及談忠孝奇
節輒抵掌奮發慷慨流涕不能自已遇羈人才士失志無聊
多方爲之延譽死喪困郵不遺餘力天下士以是益歸其門
入則盡力編摩出則酬應賓客又砥園先生已卒格於例不
能請假居恆忽忽不樂而精力亦稍憊矣 天子知其學行

將用爲日講官司記注矣惜其老也而止辛酉典試中州稱
得人又二年進侍讀充太宗聖訓纂脩官益恪恭不敢懈
吾見其貌加衰而不自休息私憂之無何病遂卒嗟乎以公
之才使專精史事久於其職一代君臣事蹟庶有倫序乃事
未竣而遽歿不但生平交遊之情爲可慟而國家失此良
史才爲可惜也悲夫公所著書學餘集八十卷年譜四卷詩
話雜著兩卷歿後友人檢討高君詠爲編輯藏於家高公行
狀云公德器性成勤學好問寬和而善讓其學主於體仁而
文章製作極其醇雅自當世論道譚藝之最安未有過焉者
也歷官中外幾三十年無園亭聲色之奉祿入所餘則以周

其宗戚故人蓋儉以處己而好施不郊和以接物而爲善則
勇者公嘗置義田二百畝贈其族葺里中同仁館又復依仁
齋於白門以推明其祖中明公理學之緒公有蒙師劉伯陽
中明公好友死無子公葬之中明公墓傍歲時使分祀馬公
生平論人以行誼爲先而又篤好文人才士獎許後進使成
其名故交遊聲譽徧天下遇有死喪困厄則驚呼悲咤振卹
不遺餘力高澹邢孟貞江甯顧與治宛平楊商賢皆公文字
交也邢顧之歿公皆經理其喪刻其遺文顧無子邢惟一孫
以囑高澹令買田贍之商賢尤酷貧死江南公爲礮石志其
墓嫁其孤女以遺集屬於廬陵藻藻又卒公嘗以爲恨焉其

先官山左時有李夫人者宦族與女流落東萊爲追責者所迫將質女焉以告公則公同年李頰女也頰吳興人官粵東卒無子夫人與女艱楚萬狀公爲理其責而資送之後十五年而公遊茗雪間廣陵宗鶴問過訪曰某近且娶李氏矣詢之則頰女也大喜卽偕至其家夫人出拜且泣至不能仰視由是士林益義之趨者日衆爲德於人蓋不可勝數也公自官比部以來中間閱歷名績顯著論者每以公文名藉甚而未嘗登侍從及公居翰苑者四年天子初將用之爲日講官以忌見阻復命之典試中州旣歸又用爲文皇聖訓纂修官則公已不待故終不得身侍講筵出其所學備啟

沃如程正叔故事又不得奮其鴻筆以揚厲本朝之休烈作爲雅頌獻之郊廟則公之遺憾哉然其道德文章則固自在世之欲知施先生者視吾文於言貌行事之間亦可以得其崖畧矣所著有學餘集八十卷在湖西有年譜四卷詩話雜著二卷皆未成毛公西河墓表云康熙己未上初開制科詔丞相御史及諸郡縣舉天下學士備顧問者三相上君名御試授翰林院侍講充明史纂脩官明年陞侍讀值望日朝下端坐草馮恭定傳自午迄酉移案就欄隙草罷不能起左右掖之至榻間若形存者越月卒君生而仁讓於物不恐好自下勤舉而博於酬接口吃艱語詞顧論理便便聞忠

孝事及羈人才士有失職者輒感憤慷慨涕泗隨雨下又云君好忘分友天下士興謁每入刺雖臨事必屏去趨迎與談移日景非語竭氣敗不忍已後進有佳士力獎誘以成其名至所在善行不勝述

曾孫念曾編

錫山後學張 鑿校印

愚山先生年譜卷四終

翰林院侍讀前朝議大夫愚山施公墓誌銘

康熙二十二年閏六月十三日翰林院侍讀施公卒於京師之寓舍公知名海內者垂四十年天下之士或推其文學或高其行誼或稱其治術而余少同舉進士晚年同事史館相知尤深公病余往視之握手熟視曰平生知我之深無如子立言能信於世亦無如子因獻歛不能語既卒葬且有日其子彥恪遵遺命來請銘其墓宮之石余何敢辭乃垂涕序而銘之公諱閏章字尙白號愚山江南宣城人大父鴻猷明萬厯間遊鄒忠介焦石城兩先生之門爲東南人士所宗父譽以公貴贈奉政大夫山東按察司僉事叔父譽余嘗誌其墓所謂砥園先生者也兄

弟孝友內外雍穆江南言家法者推施氏公少賦異資習聞家學從沈徵君壽民遊弱冠工制舉業兼治詩賦古文辭先達多稱之順治丙戌舉於鄉己丑登進士第授刑部主事

天子大婚禮成 詔赦天下公奉使廣西因得遍遊粵西諸山水著粵江賦以見志既歸丁祖母艱服除補員外郎引經斷獄期於明允有疑獄反覆推求常至夜分曰如是則生者死者可兩無憾也諸卿大夫素以公嫺文辭或不習吏事至是藉藉言公可大用矣當是時 世祖方興起文學選尙書郎資望深者御試高等乃得補授提學使者公名居第一擢提調山東學政按察司僉事公既負文名久士子爭自磨礪冀得一當公意

而公教士以通經學古爲先論文崇雅黜浮風氣爲之一變其應 御試也大學士安邱劉公實薦之後屬其同年孤子竟以文不入格被黜落劉公語山東巡撫曰學臣不受請託獨施君耳公之能舉其職與劉公之能相與有成也時人以爲兩難云秩滿遷江西布政司參議分守湖西道時軍餉嚴迫屬邑多逋賦追呼急輒相聚爲盜公作勸民急公歌召父老垂涕而諭之父老見公長者相率輸租恐後吉水有巨室依險自保邑令來問執之以叛聞公察其僞諭令輸租而遣之因遍歷崇山廣谷間作彈子嶺大阮嘆竹源阮諸篇以告諸長吏讀者爲流涕曰施使君今之元道州也暇日修景賢白鷺洲兩書院集多士講

學其中或屏車騎往來金牛石蓮諸洞宴遊賦詩耆舊逸民亦樂就之昔羅旰江嘗爲甯國守以和易得民公大父實服膺其教公之爲政亦畧相彷彿而時事之難易有大不同者無何以裁併監司歸里而叔父砥園先生年七十老矣公依依左右有終焉之志又十年詔舉博學鴻詞之士三相國薦其才召試授翰林院侍講纂脩明史公素以文學飭吏治至是始得當著作之任益自發舒考核同異辨析疑譌是非可否無所回互而朝士大夫習其姓名求碑版詩歌者趾錯於戶四方名士負笈問業無虛日公一一應之不少倦平日口期期若不能言及談及忠孝奇節輒抵掌奮發慷慨流涕不能自己遇羈人才士

失志無聊多方爲之延譽死喪困厄振卹不遺餘力天下士以是益歸其門人則盡力編摩出則酬應賓客又砥園先生已卒格於例不能請假居恆忽忽不樂而精力亦稍憊矣

天子知其學行將用爲日講官司記注矣惜其老也而止辛酉典試中州稱得人又二年進侍讀充

太宗聖訓纂脩官益恪恭不敢懈吾見其貌加衰而不自休息私憂之無何病遂卒嗟乎以公之才使專精史事久於其職一代君臣事迹庶有倫敘乃事未竣而遽歿不但平生交遊之情爲可慟而國家失此良史才爲可惜也悲夫公所著書學餘集八十卷擬明史五卷詩話雜著二卷皆編輯藏於家公生明

萬曆四十六年十一月二十一日距卒得年六十有六於某年某月日葬於宣城某城之原配梅氏繼李氏贈封並宜人副室蔣氏徐氏子二彥淳恩貢生彥恪郡庠生孫六人琮琛琛碧珩瑤曾孫二人企曾念曾元孫開峻開崧銘曰

儉以處身惠以行仁志希先民負乎絕倫養其和平發爲菁英金石嗶嗶大放厥聲敬亭如蓋宛溪如帶丸丸松檜勿翦勿拜維茲幽堂哲人之藏青鳥告祥李葉其昌

賜同進士出身通議大夫內閣學士兼禮部侍郎年弟湯斌頓首拜撰

予少孤失學十歲始入鄉塾顧時時竊好爲詩家世父慮有妨舉業恒禁切之愚山先生鄉先達以文章行誼名海內一見亟稱賞引爲忘年交有作輒以視予卽于役千里外緘封往復相可否如面談或質以所業一字未安亦必攻摘其瑕循循善誘改而後已夫是以服習先生者歷久而皆不能忘也性故矜慎文詞流布在人口猶數數更易觀察金公長真酷好其詩以屬稿未定爲刻數卷而止先生歿三十年墓木且拱今通政棟亭曹公追念舊游懼遺文之就湮也寓書於其孤舉學餘全集投諸梓經始於丁亥五月又館其孫璫於金陵事讐校戊子九月刻垂竣而予適至覆閱諸寫本默識向時塗乙處窺先生用意

愚山先生年譜 跋
之所存蓋不欲蹈時趨競俗艷審音按節一澤於古而纏綿肫
復之情往往流溢行墨間後世讀其書彷彿其生平所謂仁義
之人其言藹如也歲戊午先生以鴻博徵改官翰林時通政公
方弱冠稱詩有寒山見遠人之句先生嘗吟諷不去口庸詎知
傳先生於身後者卽疇昔嗟異之人而予顧偃蹇無聞負垂髫
國士之知僅以荒言綴末簡爲足悲也戊子霜降後一日同里
後學梅庚撰於長干精舍

施愚山先生年譜正誤

卷葉行字正誤

校閱姓氏

一一二六健健

一三三二母父

一一四四彝彝

一三三三瘦骨

序

一五三七茫茫

二五五三詔詔

一五二八慕慕

年譜

一八一四膝膝

一二二七瀕濱

一八二八荅荅

一一一九率率

一九四一等字衍

一三三三束束

二二十七廿諸字衍

二七二四阜阜

二二十八三送字衍

二八一十采采

二二十七誤空

二九九十下脫便字

三五四二憩憩

二十七十帳帳

四三一八與興

二十八四段段

四三四十揚揚

二十八八棄棄

四三十一修脩

二十十六大大

四四二十八修脩

二十七九下脫房字

四五十七修脩

二十三廿急急

四六二十七修脩

四六十六修脩

二十九修脩

四六七四二兩

三六六修脩

四六九十八要安

四七四廿焉馬

四八七十五修脩

四八八十八欄欄

四八十六學舉

墓志銘正誤

卷葉行字正誤

二七三廿乘來

